


Domie van Leeuwen



'k Was bliede mit joen stukje over domie Van Leeuwen: in 't Nijsblad heb 'k er niks over vinden kent en 't was toch wel neudig om dizze beschaiden veurvechter van de Grunneger kultuur te herdenken. Gelukkig har Trouw van 22 jannewoarie wel 'n stukje van mie op de kerkpagina opnomen. Dokter Jan Boer, de veurzitter van de Stichten Grunneger Bouk har mie 't ain en ander verteld, o.a. dat domie Van Leeuwen zo beschaiden was dat e zichzulf nait vermeld har in zien standoardwaark. Nog 'n klaine aanvull'n: ie schriev'n dat zien olders 'nait laank doarnoa' noar Winschoot

verhoesden, moar doar zat toch nog wel tien joar tussen. Noa Graft het zien voader nog twei andere gemainten had: Bergum in Fraisland en Aartswoud in Noordholland. Ik wait dat zo goud omdat ik in 1988 'n vroaggesprek mit domie Jan van Leeuwen har, de drei joar jongere bruir van Piet. Jan wur in 1909 in Bergum geboren. Hai herinnert 't zuch wel nait, moar hai is nog deupt deur de bekende domie Horreus de Haas. Wat hai zuch nog wel herinnert, is de störmramp van 1916, toun 'n groot gedailte van Woaterland en de haile Anna Paulonownaolder

overstroomde. Voader was toun doomnee in Aartswoud. In 't zulfde joar verhoesden ze noar Winschoot, woar heur voader in 1943 aan zien emeritoat toukwam. In 1950 kwam hai oet tied. In Winschoot is e ja veul koalslag in de binn'nstad west zodat er van de pastorie en de omgeev'n nait veul trug te vinden is, moar de broene beukeboom dei in pastorietoene ston, dei is er nog, royoal oetspoard in 't parkeerterrain van 't winkelcentrum.

**Ko Veldkamp,
Groningen.**

WC
2-4-92